

I lûcs e la int de Val Aupe tal documentari di Ivo Pecile

Doi viaz a bunore doi viaz a la sere, produsût di *SentieriNatura*, al à cjakât il Premi special tant che il miôr cine sul Friûl. Venit e Trentin te XIX edizion dal *Film Festival de Lessinie*, davuelzût a Bosco Chiesanuova (Verone) dal 23 di Avost al prin di Setembar.

Tai concors cinematografics talians, il *Film Festival de Lessinie* al è un dai pôcs che a dedichin la lôr atenzion a cines su la vite, la storie e lis tradizioni de montagne, ch'a sedin curtmetraçs, documentaris, luncmetraçs e cines di animazion.

Viert anje a concorrents internazionâi, il festival al à quasi vincj agns di storie. La jurie di chest an e à volût premiâ la regie dal furlan Ivo Pecile, che di passe 30 agns al fâs il naturalist e il fotograf.

Ma fevelin dal lavor premiât, *Doi viaz a bunore doi viaz a la sere* al è un documentari zirât tai borcs vieris dal Cjanâl da la Aupe, cualchidun cumò abandonât. I abitants di une volte a tornin vulintir tai puesc de lôr infanzie e zovintût e, passât il prin moment di esitazion, a contin de lôr vite te valade. Cu

lis imagjinis dal paisaç dal Cjanâl da la Aupe, la descrizion minuziose de vecje mubilie, restade chê di agnorum fa, e la ricercje precise dai particolârs dai insediamenti, il regist al vûl fa onôr, cun cetant aflet, a la valade e a lis personis che cun fadie e dignitat a ân vivût chi tai temps passâts. Timp dûrs, che i intervistâts a tornin a vivi cun serenitat, fevelant in marlenghe. Salacor al è propit chest leam che la jurie e à sintût cussi fuart e lu à sintetizât tes motivazions dal premi cun chestis peraulis: «Lis tradizioni



La Grauvaro d'istât intune fotografie di Pier Francesco Lugo

antighis e i ricuarts vieris, contâtis cun semplicitat e rispiet, a documentin, cuntun pêl di nostalgie, la vite dai pais de montagne furlane te prime metât dal secul passât».

Doi viaz a bunore doi viaz a

la sere al è stât ametût al *Festival de Lessinie* dopo di une selezion jenfri 234 oparis rivadis di 43 nazions. Il filmât, che al dure 36 minûts, al è stât realizât dut in alte risoluzion e al è commentât di Carlo Tolazzi, vôs e

autôr des traduzions in furlan. La ceremonie di premiazion si è davuelzude sabide ai 31 di Avost te sale dal Teatri Vittoria a Bosco Chiesanuova, tal cûr dal Parc naturâl regional de Lessinie.

Il cine al fâs part des tantis aktivitâts che Ivo Pecile e Sandra Tubaro a puartin indevant di plui di dis agns a pro de diffusion de culture de montagne furlane. Ta chest contest, in plui de produzion in propri di documentaris, o ricuardin il portâl www.sentierinatura.it, la golaine di vuidis escursionisticis publicade di Co.El. e la transmission televisive *Sentieri-Natura*, rivade a la setime edizion.

Il trailer dal documentari e altris informazions su la programazion des proiezions si puedin cjâth tal sit <http://www.sentierinatura.it> o cirint il titul diretementri tai motôrs di ricercje.